



## FOTOAM-BAVAKA Zoma 04 septambra 2020

### Fiarahabana

Ampotomboina mandrakariva ho antsika anie ny fahasovana sy ny fiadanana avy amin'Andriamanitra Raintsika sy Jesosy Kristy Tompo sy Mpamonjy. Amena.

**Fanolorana :** Lohahevitra mandritra ny herinandro : **Iza moa i Jesosy ?**  
Anio dia **"NY MOFO INDRAY" araka ny Matio 15.29-16.12**

### Hira Chorale

#### Vavaka

#### Vakiteny 1 : Matio 15.29-31

*29 Ary raha niala teo Jesosy, dia nankany amoron' ny Ranomasin' i Galilia Izy; ary niakatra nankeo an-tendrombohitra Izy ka nipetraka teo;30 ary nisy vahoaka betsaka nankeo aminy nitondra ny mandringa, ny jamba, ny moana, ny kilemaina, ary ny maro hafa koa, ka nametraka azy teo akaikin' ny tongotr' i Jesosy; dia nahasitrana azy Izy;31 ka dia talanjona ny vahoaka, raha nahita ny moana miteny, ny kilemaina sitrana, ny mandringa afaka, ary ny jamba mahiratra; dia nankalaza an' Andriamanitry ny Isiraely izy.*

**Hira : 485 :1,3.** Moa Jesosy ve tsy ahy

#### Vavaka

Misaotra an'Andriamanitra noho ny nanirahany an'i Jesosy Kristy hitondra ny Fanjakan' Andriamanitra ho eto amintsika, ho an'ny olona rehetra.

Mivavaka ho an'ny marary rehetra, na any amin'ny hôpitaly na any amin-tokantrano.

Mba hahay misaotra an'Andriamanitra noho ny asa entin'Andriamanitra mampiseho sy mitondra ny Fanjakany eo amintsika (mihinana isan'andro, mahazo fahalalana tsara, manana fahasalamana, afaka mahazo fitsaboana sy fanasitranana, sns...)

## **Vakiteny 2 : Matio 15.32-39**

*32 Ary Jesosy niantso ny mpianany hankeo aminy ka nanao hoe: Mahonena Ahy ny vahoaka, fa efa nitoetra hateloana tatỳ amiko izy izao ka tsy manan-kohanina; ary tsy tiako ny hampody azy tsy mihinana, fandrao reraka eny an-dalana izy.33 Fa hoy ny mpianatra taminy: Aiza no hahitanay mofo atỳ an-efitra ampy hahavoky izao vahoaka betsaka izao! 34 Ary hoy Jesosy taminy: Misy mofo firy any aminareo? Ary hoy izy: Fito sy hazandrano madinika vitsy foana.35 Ary Izy nandidy ny vahoaka betsaka hipetraka amin' ny tany.36 Dia nandray ny mofo fito mbamin' ny hazandrano Izy, ary rehefa nisaotra, dia namaky ka nanolotra azy ho an' ny mpianatra, ary ny mpianatra kosa nanolotra ho an' ny vahoaka.37 Ary nihinana avokoa izy rehetra, ka dia voky; ary nangoniny ny sombintsombiny sisa tsy lany, ka dia nahafeno sobiky fito.38 Ary izay nihinana dia efatra arivo lahy, afa-tsy ny zaza amim-behivavy.39 Ary nony efa nampody ny vahoaka Izy, dia niondrana an-tsambokely ka nankany amin' ny sisin-tanin' i M agadana.*

**Hira : 432 :1,3.** Mandra-pihavin'ny Tompo

### **Vavaka**

Mba hiorina amin'ny finoana sy ny fiankinana amin'Andriamanitra fa tsy handeha amin'ny fisinan'ny maha-olona na hitoky amin'ny herin'ny tena (fiainana andavanandro, na eo amin'ny fiainan'ny ankohonana na eo amin'ny fanompoana eo amin'ny Fiangonana).

Hivavaka ho an'ireo sahirana mba hatoky sy hiankina amin'ny Tompo izay mahay manome ny saha amin'ny fotoana.

## **Vakiteny 3 : Matio 16.1-4**

*1 Ary ny Fariseo sy ny Sadoseo nankeo aminy, dia naka fanahy Azy ka nangataka Azy haneho famantarana aminy avy any an-danitra.2 Ary Izy namaly ka nanao taminy hoe: Nony hariva, dia hoy hianareo: Ho tsara ny andro, fa mena ny lanitra.3 Ary nony maraina, dia hoy hianareo: Ho ratsy ny andro, fa mena sy manjombona ny lanitra. Fantatrareo ny hamantatra ny tarehin' ny lanitra, fa ny famantarana ny fotoana dia tsy hainareo.4 Izay taranaka ratsy fanahy sy mijangajanga dia fatra-pitady famantarana; nefa tsy misy famantarana homena azy, afa-tsy ny famantarana ny amin' i Jona ihany. Ary nandao azy Jesosy ka lasa. 5 Ary rehefa tonga teny am-pita ny mpianatra, dia nanadino hitondra mofo izy.6 Ary hoy Jesosy taminy: Mihevera, ka mitandrema hianareo, fandrao azon' ny masirasiran' ny Fariseo sy ny Sadoseo.7 Dia niara-nisaina izy ka nanao hoe: Ny tsy nitondrantsika mofo angaha izany.8 Ary Jesosy nahalala izany, dia nanao hoe: Nahoana hianareo, ry kely finoana, no miara-misaina satria tsy manana mofo?9 Tsy mbola mahafantatra va hianareo, ary tsy tsaroanareo va ny mofo dimy ho an' ny dimy arivo, ka firy harona moa no nangoninareo?10 na ny mofo fito ho an' ny efatra arivo, ka firy sobiky moa no nangoninareo?11 Ahoana no tsy ahafantaranareo fa tsy ny amin' ny mofo no nolazaiko taminareo? Fa tandremo, fandrao azon' ny masirasiran' ny Fariseo sy ny*

*Sadoseo.12 Dia fantany fa tsy nasainy hitandrina izy, fandrao azon' ny masirasira fanaovana mofo, fa andrao azon' ny fampianaran' ny Fariseo sy ny Sadoseo.*

**Hira : 485.4,5.** Moa Jesosy ve tsy ahy

### **Vavaka**

Vavaka malalaka.

**Teny fandravonana.** Jaona 6.32-35

*Dia hoy Jesosy taminy: Lazaiko aminareo marina dia marina tokoa: Tsy Mosesy no nanome anareo ny mofo avy tany an-danitra; fa ny Raiko no manome anareo ny tena mofo avy any an-danitra. Fa ny mofon' Andriamanitra dia Ilay midina avy any an-danitra ka manome fiainana ho an' izao tontolo izao. Ary hoy ireo taminy: Tompo ô, omeo anay mandrakariva izany mofo izany. Hoy Jesosy taminy: Izaho no mofon' aina; izay manatona Ahy tsy mba ho noana, ary izay mino Ahy tsy mba hangetaheta intsony.*

**Hira 444 : 4** Ry Jeso, Mofon'aina

**Tsodrano.** Ef.6.23-24

Fiadanana anie ho an' ny rahalahy ary fitiavana mbamin' ny finoana avy amin' Andriamanitra Ray sy Jesosy Kristy Tompo.24 Ny fahasovana anie ho amin' izay rehetra tia an' i Jesosy Kristy Tompontsika amin' ny fitiavana tsy mety levona. Amena.